



Բյուրեղավանի Ս. Վարդանյանի անվան ավագ դպրոցի ուսուցչական կազմն այսօր տնօրեն Կարինե Խաչիկյանի գլխավորությամբ վաստակաշատ հանգստի է ձանապարհում հայոց լեզվի և գրականության ուսուցչուհի Լալա Անտոնյանին: Կոչումով մանկավարժ, ով իր կյանքի 45 տարիները նվիրել է մատաղ սերնդի կրթության և դաստիարակության գործին: Գործընկերները կազմակերպել էին հրաժեշտի ցերեկույթ, որտեղ բոլորը հուզված էին: Լալա Անտոնյանն ավարտել է Երևանի մանկավարժական ինստիտուտի բանասիրության ֆակուլտետը: Աշխատանքային գործունեությունը սկսել է 1973թ-ին, ավանդույթներով հարուստ՝ Բյուրեղավան քաղաքի թիվ 1 դպրոցում: Հիմնադրումից մինչ օրս աշխատել է թիվ 1 դպրոցում, որը հիմա ավագ դպրոցն է: Նույն դպրոցում 35 տարի միասին, ասում է տնօրեն Խաչիկյանը. «Ընկեր Անտոնյանի հետ աշխատել եմ 30 տարուց ավելի, սերունդներ են փոխվել, բայց նա մնացել է բարեխիղճ, պատասխանատու, չափազանց զուսպ և բացառիկ մարդ՝ իր տեսակով: Աշխատել է ջոկատավար, հետո արդեն դասավանդել է հայոց լեզու և գրականություն: Տարիների ընթացքում նրա հանդեպ հարգանքը մեծացել է, թե՛ աշակերտների, թե՛ մեր կոլեկտիվի կողմից: Իր գործի նվիրյալ: Անցումային տարիներն անգամ չփոխեցին նրան, երբևէ ձայնը չբարձրացրեց աշակերտների վրա: Ցավով ենք այսօր ձանապարհում նրան, դժվար է լավ մարդուց բաժանվելը...» Լալա Անտոնյանին շնորհակալագիր էր ուղարկել համայնքի ղեկավար Հակոբ Բալասյանը: Շնորհակալագիրը՝ երկարամյա մանկավարժական գործունեության, մատաղ սերնդի կրթության և դաստիարակություն գործում ունեցած ավանդի համար էր: Դպրոցի տնօրինության կողմից ևս արժանացավ շնորհակալագրի: Տխրություն կար ընկեր Անտոնյանի աչքերում, երբ խոսքը փոխանցեցին նրան հուզվեց. «Դուք ոչ թե իմ գործընկերներն եք, այլ հարազատները: Շատ հուզումնալից պահ է ինձ համար, ինչու ոչ, նաև կյանքի փոփոխություն: Ես գնում եմ, բայց բոլորդ հոգուս մեջ եք. ձեր դեմքերը, հայացքները տանում եմ ինձ հետ: Դպրոցի պատերն ու անգամ մուտքի դուռը հարազատ են ինձ : Ինձ համար ամենամեծ գնահատականը աշակերտներիս և գործընկերներիս սերն է, որտեղ ոչ մի ձևական բան չկա»: Հաճելի պահ՝ մանկավարժը գնում է վաստակաշատ հանգստի, սակայն տխուր, որ տեղափոխվում է Հայաստանից ԱՄՆ-ը՝ երեխաների մոտ:

07.06.18